

МЕСЯЦА АПРИЛИЯ В 30-Й ДЕНЬ
СЛУЖБА СЯТИТЕЛЮ ИГНАТИУ,
ЕПИСКОПУ КАВКАЗСКОМУ И ЧЕРНОМОРСКОМУ
НА МАЛОЙ ВЕЧЕРНИ

На Господи, возвах: **стихиры на 4, глас 2:**

Подобен: Егда от Древа:

Святителю Игнатие пречудне, * бысть Фиваида Российская земля северная, * иноческих подвигов и трудов твоих начало, * идеже Подвигоположника Господа Иисуса, * в молитвенном делании тебе укрепляюща, обрел еси.

Егда в возраст пришед, * начальник монахов соделался еси, * тогда обитель северная во имя Сергия Преподобнаго прият тя, отче, * и тамо познал еси меру скорбей великих и болезней тяжких, * таже и утешения от присных братий твоих, * и посещения Явльшагося ти * Духа Утешителя сподобился еси.

Страны южныя, * близ Понта лежащая, * послушанием Святей Церкви достигл еси, отче, * во святительском звании твоём * явился еси отец и наставник народов * и племен Кавказских, * жаждавших слова Христова.

Егда же время отшествия твоего приближися, * святителю Господень Игнатие, * тогда во обители иночестей на бреже Волжстем, * труды слова и молитвы полагая, * со упованием к Богу отшел еси, * в Немже обрет покой и мир мног.

Слава, и ныне, праздника.

На стиховне стихиры, глас 1:

Подобен: Небесных чинов:

Ученьми отца духовнаго наставляемь, * отче Игнатие, * правилом жизни иноческия обучался еси * и, в послушаниих различных упражняся усердно, * путь святых совершил еси.

Стих: Честна пред Господем смерть * преподобных Его.

Мудрость стяжав духовную, * такожде и знание писаний отеческих, * чада послушания во множестве приобрел еси, отче, * ихже к Царству Небесному * и вечному духовно руководил еси.

Стих: Блажен муж, бояйся Господа, * в заповедех Его восхощет зело.

Возлюбив душу ближняго твоего, * еже ко Господу Спасу привести ю, * любовь духовную к чадам твоим являя, * псаломски восклицал еси: * приидите, чада, послушайте мене, * страху Господню научу вас.

Слава, и ныне, праздника.

Тропарь, глас 8:

Православия поборниче, покаяния и молитвы делателю и учителю изрядный, * архиереев богодухновенное украшение, монашествующих славо и похвало: * писании твоими вся ны уцеломудрил еси. * Цевнице духовная, Игнатие богомудре, * моли Слова Христа Бога, Егоже носил еси в сердце твоём, * даровати нам прежде конца покаяние.

Ин тропарь, глас тойже:

Избранник возлюблен Христови явился еси, * Тому скорбьми многими и молитвою непрестанною прилепился, * благодать Духа Святаго стяжав, * учитель изряден людем был еси. * Поминай нас, святителю Игнатие, богоносе Российский, * да учении и молитвами твоими покаяние спасительное обрящем * и любовию сердечною Христу усвоимся.

Богородичен глас тойже:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянныя.

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи,воззвах: стихиры, глас 5:

Подобен: Радуйся:

Радуйся и веселися светло, земле Российской, * новаго святителя Божия, Игнатия, явившая, * иже веру Христову писаньми своими изъясни * и, законы Духа восписуя, * стезю жития духовнаго ясно содела.

Радуйся, святителю Игнатие предивне, * измлада путь заповедей Христовых возлюбив, * избранник Господень предивен явился еси, * горнило же искушений и бед прешед, * учитель православным людем показася, * жизни вечныя законы духовныя изъясняя.

Радуйся, иже во иночестем чине имя Богоносца восприял еси, * сице и сам, святителю Игнатие, * скорби и болезни, яко священномученик, * терпя, чрез все житие твое имя Христово * внутрь сердца своего запечатлел еси, * молитвою непрестанною укрепляясь.

Радуйся, святителю Христов богومудре, * Бога Истиннаго и Жива взыскав, * даже до конца дний твоих предстоял еси Христу, * молитвою непрестанною и любовию укрепляясь, * таже терпением скорбей находящих утверждаясь.

Слава, глас 4:

К правде вечней и жизни нескончаемей устремился еси, * святителю Игнатие пречудне, * и сия ближним твоим исповедуя, * к любви Божией призывал еси, * ныне же в незаходимей славе жития * непрестающаго в Царствии Христове сияеши.

И ныне, праздника.

Вход. Прокимен дне.

И чтения три святительская.

Притчей чтение. [Главы 3 и 8.]

Память праведнаго с похвалами, и благословение Господне на главе его. Блажен человек, иже обрете премудрость: и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней, и лета живота в деснице ея: в шуйце же ея богатство, и слава. От уст ея исходит правда, закон же и милость на языке носит. Послушайте убо мене, о чада! честная бо реку: и блажен человек, иже пути моя сохранит: исходи бо мои, исходи живота, уготовляется хотение от Господа. Сего ради молю вас, и предлагаю мой глас сыновом человеческим: яко аз премудрость устроих совет, и разум и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо незлобивии коварство, ненаказанныи же прилагайте сердца. Послушайте мене и паки, честная бо реку, и отверзу от устен правая: яко истине поучится гортань мой, мерзки же предо мною устны лживыя. С правдою вси глаголы уст моих: ничтоже в них стропотно, ниже развращенно: Вся права суть разумевающим, и проста обретающим разум. Научу бо вас истине, да будет о Господе надежда ваша, и исполнитесь Духа.

Притчей чтение. [Главы 10 и 11.]

Уста праведнаго каплют премудрость, язык же неправеднаго погибнет. Устне мужей праведных каплют благодати, уста же нечестивых развращаются. Мерила льстивая мерзость пред Господем: вес же праведный приятен Ему. Идеже аще увидет досаждение: тамо и безчестие: уста же смиренных поучаются премудрости. Совершенство правых наставит их, и поползновение отрицающихся упасет их: Не пользуются имения в день ярости, правда же избавит от смерти. Умер праведный, остави раскаяние: наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их: безсоветием же пленяются беззаконнии. Скончавшуся мужу праведну, не погибнет надежда: похвала же нечестивых погибнет. Праведник от лова убежит, вместо же его предается нечестивый. Во устех нечестивых сеть гражданином, чувство же праведных благопоспешное. Во благих праведных исправится град, и в погибели нечестивых радование: Во благословении правых возвысится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломоновы чтение. [Глава 4.]

Праведник аще постигнет скончатися, в покои будет. Старость бо честна не многолетна: ниже в числе лет исчитается. Седина же есть мудрость человеком, и возраст старости, житие нескверное. Благоугоден Богу быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая, и парение похоти пременяет ум незлобив. Скончався в мале, исполни лета долга: Угодна бо бе Господеви душа его. Сего ради потщася от среды лукавствия. Людие же видевшие, и не разумевшие, ниже положше в помышлении таковое: яко благодать и милость в преподобных Его, и посещение во избранных Его.

На литии стихиры, глас 1:

Мысль спасительную, * еже последовати учению святых отец, нарекл еси, * отче преподобне, * звезду твою, путеводствующую тя * и освящающую тесный путь ума и сердца твоего к Богу.

Мысль благая, * путеводствующая тя, отче богомудре, * на источники воды живыя * приведе во обители иноческия, * идеже в подвизах мнозех Бога приобрел еси.

Слава, глас тойже:

Страну истины обрел еси, * отче преподобне, * учение святых отец и, тех писанием * чрез все житие твое усердно последовав, взывал еси: * сии суть звезды Небесныя, * испускающия согласный и единый свет, * сии суть корабли, идущии к пристани единой, * сей лик, воспевай единую Божественную песнь * и тех учению последуя, * душу твою к вечней жизни управил еси.

И ныне, праздника.

На стиховне стихиры, глас 6:

Песнь священную воспел еси, * преподобне отче, * под сению Креста Господня, * песнь хвалы и благодарения, * темже и людем Божиим, * в странствии сущим, * воздавати хвалу Богу * у подножия Древа Крестнаго * помози твоими молитвами.

Стих: Честна пред Господем смерть * преподобных Его.

Изъяснил еси нам, отче, * писании твоими, * что есть чаша Христова. * Сию чашу скорбей и напастей, * отче преподобне, * яко дар Божий, * с благодарением приимати * в житии нашем помози нам * твоими молитвами.

Стих: Священницы Твои облечутся в правду, * и преподобнии Твои возрадуются.

Житейское море страстей * и скорбей душею твердою прешел еси, * яко кораблем, темже души наша, * волнами греховными обуреваемыя, * сохрани в спасительном корабле Церкви Христовы, * яко молитвенник изрядный.

Слава, и ныне, праздника.

Тропарь, глас 8:

Православия поборниче, покаяния и молитвы делателю и учителю изрядный, * архиереев богодухновенное украшение, монашествующих славо и похвало: * писании твоими вся ны уцеломудрил еси. * Цевнице духовная, Игнатие богомудре, * моли Слова Христа Бога, Егоже носил еси в сердце твоём, * даровати нам прежде конца покаяние.

Ин тропарь, глас тойже:

Избранник возлюблен Христови явился еси, * Тому скорбьми многими и молитвою непрестанною прилепился, * благодать Духа Святаго стяжав, * учитель изряден людем был еси. * Поминай нас, святителю Игнатие, богоносе Российский, * да учении и молитвами твоими покаяние спасительное обрящем * и любовию сердечною Христу усвоимся.

Богородичен глас тойже:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянные.

НА УТРЕНИ

На Бог Господь: тропарь праздника дважды.

Слава, святителя, глас 8:

Православия поборниче, покаяния и молитвы делателю и учителю изрядный, * архиереев богодухновенное украшение, монашествующих славо и похвало: * писании твоими вся ны уцеломудрил еси. * Цевнице духовная, Игнатие богомудре, * моли Слова Христа Бога, Егоже носил еси в сердце твоём, * даровати нам прежде конца покаяние.

И ныне, праздника.

По 1-м стихословии седален, глас 2:

Молитвами и скорбьми многими * в житии твоём Христу соединився, * учитель изряден и помощник людем твоим явился еси, * святителю Игнатие, * моли о чтущих память твою, блаженне.

Слава, и ныне, праздника.

По 2-м стихословии седален, глас 8:

Рекл еси, отче: * еже размышляти о вочеловечении Бога Слова, * о спасительных страданиях и Воскресении Его, * степень есть видения духовнаго, * юже молитвами твоими сподоби ны стяжати, * отче преподобне.

Слава, и ныне, праздника.

По полиелеи седален, глас 5:

Подобен: Преподобне отче:

Преподобне отче, * святителю всечестне, * ты учил еси, яко молитва, * вера правая и терпение скорбей потребны, * во еже спастися. * Помози нам, святче Божий, * да ученьми твоими ограждаеми, * спасение душ наших улучим.

Слава, и ныне, праздника.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящии Сиона, * посрамитесь от Господа, * яко трава бо огнем * будете изсохше.

Слава и ныне: Святым Духом * всяка душа живится, * и чистотою возвышается, * светлеется Троическим Единством священнотайне.

Прокимен, глас 7:

Прокимен: Честна пред Господем смерть * преподобных Его.

Стих: Что воздам Господеву о всех, яже воздаде ми?

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегае, и волк расхитит их, и распудит овцы. А наемник бежит, яко наемник есть и

нерадит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме стихира, глас 6:

Познал еси тайну святых трапезы Господни * в сиянии светила великаго: * якоже солнце, учил еси, * во всяцей капли росы отображено есть, * такожде и в трапезе Господни * кийждо приобщен есть Христу всецело * по Божеству и человечеству. * К сему же таинству со страхом Божиим * и неосужденно приступати твоими молитвами, * святе Игнатие, нас сподоби.

Канон праздника. И святителю, глас 8.

Песнь 1

Ирмос: Колесницегонителя фараона погрузи * чудотворяй иногда * Моисейский жезл, крестообразно поразив * и разделив море, * Израиля же беглеца, пешеходца, спасе, * песнь Богу воспевающа.

Путь духовный, к Богу Живу ведущий, прешел еси, святителю Игнатие, ясно указуя нам, како подобает стезю жития земнаго переходити, учению Христову внемлюще.

Первую ступень в лестнице добродетелей евангельских, нищету духовную, узрел еси, отче, и той последовати, тую возлюбити, тою пути духовнаго начала полагати завет твой дал еси.

Нищета духа, рекл еси, соль есть всех жертв духовных, нищета бо духа блаженство первое наречется во Святем Евангелии Христове, ейже вси прочии блаженства, кротость, милосердие, сердца чистота, последуют и ею совершаются.

Богородичен: Мати Света, Пречистая Богородительнице, житие спасительно на земли с Сыном и Богом Твоим совершившая, нас, недостойных, укрепи, от грехов избави и к правде вечней шествовати утверди.

Песнь 3

Ирмос: Небеснаго круга * Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * едине Человеколюбче.

Правду Христову в житии своем восписуя, святителю Христов Игнатие, обрел еси на пути сем, еже плакати и рыдати о содеянных злых и к Спасителю мира притекати.

В юности плачем иноческим горце восплакал еси в келлии своей о разрушении храма сердца человеческого, Богом созданнаго богослужения возвышеннаго ради, о пленении души и ума, от сих же всех токмо едином Богочеловеком Спасителем избавимся.

И паки плач стяжал еси, отче, в иночестем житии твоём, егда вся преграды, от Бога удаляющия тя, препобедил еси. Сего плача ради помяни нас, чтущих святую память твою.

Богородичен: Дево Пречистая, печали наша и скорби утешающая, плач спасительный подавай нам, да о бездне зол наших и неправд восплачем пред Тобою.

Седален, глас 3:

Поучал еси, отче достохвальне, * яко молитву чисту стяжати, * таже чувство покаяния и плача возлюбити довольно есть, * во еже спасение вечное улучшить, * егоже и нас, грешных, * сподоби молитвами твоими, святе.

Слава, и ныне, праздника.

Песнь 4

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставь недра Отца * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Тайны жития иноческаго взыскуя, блаженне Игнатие, познал еси, яко каятися подобает и труд иноческий ничтоже ино есть, еже делание непрестаннаго покаяния.

В покаянии, слезах и плаче о содеянных злых узрел еси, отче, спасения путь, к Горней жизни ведущий, иже предлежит и всякому носящему имя Христово.

Рекл еси, отче преподобне, яко должно есть покаянием страсти отсекасти, таже покаянием доброделание стяжати, и аще не узрит око наше, яко грешни есмы, не имамы спасения вечнаго улучшить.

Богородичен: Мати Божия, грешных Споручнице и Помощнице, путь наш, к Богу ведущий, покаянием истинным укрепи, зрением греха и исповеданием его направи.

Песнь 5

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго, * но обрати мя и к свету заповедей Твоих * пути моя направи, молюся.

Плачем и покаянием непрестанным душу твою снабдевая, отче Игнатие, делатель молитвы явился еси, сию от возраста младенческаго возлюбив, и в основание жизни духовныя положил еси.

Молитвою усердною житие твое от юности укрепляя, даже до кончины подвиг твой молитвенный ко Христу Богу соблюдал еси, имже о Бозе Спасе утверждаяся.

В возраст мужеский пришед, монахов начальник быв и многообразныя скорби испытуя, в молитве твердей и непрестанней со многими слезами ослабу и отраду истинную почерпал еси, отче всеблаженне.

Богородичен: Дево Пречистая, Мати Христа Бога, венец молитвы неусыпающая, о нас, грешных, мольбу Богу принеси и молением Твоим от напастей и скорбей нас избави.

Песнь 6

Ирмос: Молитву пролию ко Господу * и Тому возведу печали моя, * яко зол душа моя исполнися * и живот мой аду приблизися, * и молюся, яко Иона: * от тли, Боже, возведи мя.

Явился еси учитель молитвы сердечныя, отче наш Игнатие, ясно наставляя, како должны есмы пред лицом Христовым предстояти и молитву покаяния творити.

Подобает на молитве, поучал еси, отче, встати в лице покаженных, слепых, глухих, хромых и тако ко Христу, от сердца сокрушеннаго, от нищеты духа нашего, молитву тщатися творити.

Егда тишина взвеет в сердце на молитве, поучал еси, отче, и мир ко всем, смирение, сострадание и любовь к человеку, тогда познаем, яко благодать Духа Свята сие содела.

Богородичен: Мати Божия, Духа Святаго Приятелище непостижимое, о смертных нас молися и молитву нашу к Богу управи.

Кондак, глас 8:

Подобен: Аще и во гроб:

Аще и совершал еси стезю жития земнаго, святителю Игнатие, * обаче непрестанно зрел еси законы бытия вечнаго, * сему поучая ученики словесы многими, * имже последовати и нам, святче, помолися.

Икос: Рекл еси, отче, в писаниих твоих, яко подобает имети страх Божий, дабы вступить в совершенство всех добродетелей, любовь Божию, и тако Отцу Небесному уподобиться. Сему учению последовати и нам, святче, помолися.

Синаксарий (Из поучений святителя Игнатия «О внимании и молитве»)

Молитва нуждается в неотлучном соприсутствии и содействии внимания. Молитва составляет неотъемлемую собственность молящегося, а при отсутствии внимания она чужда молящемуся. При внимании она приносит обильный плод; без внимания она приносит терние и волчцы. Плод молитвы состоит в просвещении ума и умилении сердца, в оживлении души жизнью Духа; терние и волчцы это мертвость души, фарисейское самомнение.

Внимание, которое вполне охраняет молитву от отвлечения или от посторонних помыслов и мечтаний, есть дар благодати Божией. Искреннее желание получить благодатный дар, душеспасительный дар внимания принуждением себя к вниманию при каждой молитве нашей.

Искусственное внимание, еще неосененное благодатию, состоит в том, чтобы заключить ум в слова молитвы. Если ум, по причине новости своей в молитвенном подвиге, выйдет из заключения в слова, то должно опять вводить его в них. Свойственны уму, в состоянии его падения, неустойчивость и расположение парить повсюду. Но Бог может даровать ему непоколебимость и дарует ее в свое время за постоянство и терпение в подвиге.

Особенно способствует вниманию во время молитвы весьма неспешное произнесение слов молитвы. Произноси слова не спеша, чтобы ум мог с большим удобством сохранить заключение свое в словах молитвы, чтобы он не ускользал ни из одного слова ее. Когда ты молишься наедине, произноси слова несколько вслух это способствует сохранению внимания.

Запасись благовременно всесильным оружием молитвою, благовременно научись действовать им. Молитва всемогуща по причине действующаго в ней Всемогущаго Бога. Она — «меч духовный, иже есть глагол Божий». Молитва, по качеству своему, есть пребывание человека при Боге и соединение человека с Богом; по действию своему она — примирение человека с Богом, мать и дочь слез; мост, по которому переходят через искушения; стена, защищающая от скорбей; сокрушение браней, бесконечное делание, источник добродетелей, причина духовных дарований, невидимое преуспяние, пища души, просвещение ума, отсечение отчаяния, указание надежды, разрешение печали.

Сначала нужно понуждаться к молитве; вскоре она начнет доставлять утешение и этим утешением облегчать понуждение, одобрять к понуждению себя. Но к молитве нужно понуждение в течение всей жизни, молитва действует убийственно на нашего ветхого человека; доколе он жив в нас, доколе противится молитве, как и вкушению смерти.

По важному значению молитвы, пред упражнением ею нужно приготовление себя к ней.

Песнь 7

Ирмос: Отроцы еврейстии в пещи попраша * пламень дерзновенно * и на росу огонь преложиша, вопиюще: * благословен еси, Господи Боже, во веки.

В зимнем обнажении ветвей древесных поучался еси, отче, тайне воскресения мертвых, якоже бо древо во время свое листвием покрывается, тако и кости человеческия оживут и, облечешся плотию, в мир новый вступить имут.

Познал еси, отче, елико возможно, тайну кончины бытия человеческого, тайну естества ангельскаго и души человеческия, и воздал еси благодарение Богу.

Единого токмо Бога, Духа Истины, исповедал еси, Иже един всесовершен есть, Ему же поклоняющися, тя, отче, величаем.

Богородичен: Дево Марие, Мати Неизреченнаго Света, нас, грешных, от мысленных падений огради, Божественное же учение Церкви Святыя в сердцах наших укрепи.

Песнь 8

Ирмос: На горе святей прославльшася * и в купине огнем Приснодевы * Моисеови тайну явльшаго, * Господа пойте * и превозносите во вся веки.

Возлюбил еси, отче, служити братии словом Божиим, и бысть тебе служение сие в подвиг жития твоего, нам же в радование непреложное, вопиющим ти: не остави нас, отче, словом и молитвами твоими.

В служении Слову услышал еси в души твоей глас уверения во спасении, сего ради преискренне возлюбил еси ближних твоих и самое то Слово Божие.

Поучал еси ближних твоих, святителю, яко Спаситель наш есть Огнь Небесный, Иже и в словесех Его евангельских действует.

Богородичен: Мати Божия, Бога Слова рождающая, даждь слово рабом Твоим, еже сказати тайну всемилостиваго заступления Твоего, в тайне рождения Слова, Христа Бога, явльшуюся.

Песнь 9

Ирмос: Ужасеся о сем Небо, * и земли удивихася концы, * яко Бог явися человеком плотски * и чрево Твое бысть пространнейшее Небес. * Тем Тя, Богородицу, * Ангелов и человек чиновачалия величают.

Многи труды и болезни подъяв в житии твоём, святителю всечестне, Кресту Христову, светло сияюще, поклонился еси и молитву твою ко Христу простерл еси.

Скорьбми обуреваемый, зрел еси в видении в келлии своей Странника, посетившаго тя. Откуда шествуеши? И где селения Твое? Почто доселе оставял еси е? — сладце вопиял еси, отче, явльшемуся ти Христу.

В хождении пред Господем познал еси, отче, судьбы Отчества твоего, таже и кончину твою ясно провидел еси, к Богу Слову, Христу возлюбленному, молитвенно устремляясь.

Богородичен: Мати Божия, Сияние неизреченнаго Света, стопы наша к жизни вечней направи, прощаючи вся злая, нами содеянная.

Светилен праздника.

Слава, святителя:

Имя Богоносца преславнаго в монашестем образе твоём восприем, отче Игнатие, святителю всечестне, Христа молитвою непрестанною внутрь сердца твоего вселил еси и был еси учитель, к Свету невечернему ведый, богоносец воистинну досточудный явился.

И ныне, праздника.

Стихиры на хвалитех, глас 8:

В житии твоём поучал еси, * отче преподобне, * яко сердце человеческое обретает покой, * егда в заповедех Христовых пребывает, * изобразити бо в души образ Христов * благо есть и спасительно, * сего же и нас достигнути милостивно сподоби молитвами твоими.

Христу последовал еси усердно, * святителю Игнатие, * вся мирская отложив и Крест Господень * на рамо взем, * темже пути совершенства достигл еси, * к сему и нас приведи, отче, * молитвами твоими.

Приидите, собори людей Божиих, * припадем усердно ко источнику приснотекущему, * святителю Игнатию, * богоносцу российскому, * и восхвалим, усердно просяще: * молитвами твоими, святителю, * подай просвещение душам нашим.

Слава, и ныне, праздника.

Славословие великое. Ектении. И отпуст.

НА ЛИТУРГИИ

Блаженна от канона, песнь 3-я и 6-я.

Правду Христову в житии своем восписуя, святителю Христов Игнатие, обрел еси на пути сем, еже плакати и рыдати о содеянных злых и к Спасителю мира притекати. [Дважды.]

В юности плачем иноческим горце восплакал еси в келлии своей о разрушении храма сердца человеческого, Богом созданного богослужения возвышенного ради, о пленении души и ума, от сих же всех токмо едином Богочеловеком Спасителем избавимся.

И паки плач стяжал еси, отче, в иночестем житии твоём, егда вся преграды, от Бога удаляющия тя, препобедил еси. Сего плача ради помяни нас, чтущих святую память твою.

Явился еси учитель молитвы сердечный, отче наш Игнатие, ясно наставляя, како должны есмы пред лицом Христовым предстояти и молитву покаяния творити.

Подобает на молитве, поучал еси, отче, встати в лице покаженных, слепых, глухих, хромых и тако ко Христу, от сердца сокрушенного, от нищеты духа нашего, молитву тщатися творити.

Слава: Егда тишина возвеет в сердце на молитве, поучал еси, отче, и мир ко всем, смирение, сострадание и любовь к человеку, тогда познаем, яко благодать Духа Свята сие содела.

И ныне, Богородичен: Дево Пречистая, Мати Христа Бога, венец молитвы неусыпающая, о нас, грешных, мольбу Богу принеси и молением Твоим от напастей и скорбей нас избави.

Тропарь, глас 8:

Православия поборниче, покаяния и молитвы делателю и учителю изрядный, * архиереев богодухновенное украшение, монашествующих славо и похвало: * писании твоими вся ны уцеломудрил еси. * Цевнице духовная, Игнатие богомудре, * моли Слова Христа Бога, Егоже носил еси в сердце твоём, * даровати нам прежде конца покаяние.

Кондак, глас 8:

Аще и совершал еси стезю жития земнаго, святителю Игнатие, * обаче непрестанно зрел еси законы бытия вечнаго, * сему поучая ученики словесы многими, * имже последовати и нам, святче, помолися.

Прокимен, глас 7:

Прокимен, глас 7: Возвеселится праведник о Господе, и уповаёт на Него́.

Стих: Услы́ши, Бо́же, глас мой, внегда́ моли́ти ми ся к Тебе́.

Апостол к Евреям, зачало 335.

Братие, повинуйтеся наставником вашим и покаяйтесь, тии бо бдят о душах ваших, яко слово воздати хотяще, да с радостию сие творят, а не воздыхающе, несть бо полезно вам сие. Молитесь о нас, уповаем бо, яко добру совесть имамы, во всем, добре хотяще жити. Лишше же молю, сие творите, да вскоре устроюся вам. Бог же

мира, возведый из мертвых Пастыря овцам великаго, кровию завета вечнаго, Господа нашего Иисуса Христа, да совершит вы во всяком деле блазе, сотворити волю Его, творя в вас благоугодное пред Ним, Иисус Христом. Емуже слава во веки веков. Аминь.

Аллилуия, глас 4: Священницы Твои облекутся в правду, и преподобнии Твои возрадуются.

Евангелие Луки, зачало 24:

Во время оно, ста Иисус на месте равне, и народ ученик Его, и множество много людей от всея Иудеи и Иерусалима, и помория Тирска и Сидонска, иже приидоша послушати Его и исцелитися от недугов своих, и страждущии от дух нечистых, и исцеляхуся. И весь народ искаше прикастися Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтеся в той день и възиграйте, се бо мзда ваша многа на небеси.

Причастен: В память вечную будет праведник: от слуха зла не убоится.

Молитва святителю Игнатию

О великий и пречудный угодниче Христов, святителю отче Игнатие! Милостиво приими молитвы наша, с любовию и благодарением тебе приносимыя! Услыши нас, сирых и беспомощных, к тебе с верою и любовию припадающих и твоего теплаго предстательства о нас пред Престолом Господа Славы просящих. Ве мы, яко много может молитва праведника, Владыку умилоствляющая. Ты от лет младенческих Господа пламенно возлюбил еси и Ему единому служити восхотев, вся красная мира сего ни во чтоже вменил еси. Ты, отвергся себе и взял крест твой, Христу последовал еси. Ты путь узкий и прискорбный жития иноческаго волею себе избрал еси и на сем пути добродетели великия стяжал еси. Ты писаньми твоими сердца человеков глубочайшаго благоговения и покорности пред Всемогущим Творцом исполнял еси, грешников же падших мудрыми словесы твоими в сознании своего ничтожества и своей греховности, в покаянии и смирении прибегаи к Богу наставляя еси, ободряя их упованием на Его милосердие. Ты николиже притекавших к Тебе отвергал еси, но всем отец чадолюбивый и пастырь добрый был еси. И ныне не остави нас, усердно тебе молящихся и твоя помощи и предстательства просящих. Испроси нам у Человеколюбиваго Господа нашего здравие душевное и телесное, утверди веру нашу, укрепи силы наша, изнемогающия во искушениях и скорбех века сего, согрей огнем молитвы охладевшая сердца наша, помози нам, покаянием очистившимся, христианскую кончину живота сего получитьи и в Чертог Спасов преукрашенный внити со всеми избранными и тамо купно с тобою поклонятися Отцу и Сыну и Святому Духу во веки веков. **А**минь.

Тропарь, глас 8

Православия поборниче, покаяния и молитвы делателю и учителю изрядный, архиереев Богодухновенное укашение, монашествующих славо и похвало, писаньми твоими вся ны уцеломудил еси, цевнице духовная, новый Златоусте, святителю Игнатие, моли Слова Христа Бога, Егоже носил еси в сердце твоём, даровати нам прежде конца покаяние.